



Na osnovu člana 17. stav 1. i člana 44. stav 1. Zakona o Visokom sudskom i tužilačkom vijeću Bosne i Hercegovine („Službeni glasnik Bosne i Hercegovine“, br. 25/04, 93/05, 48/07, 15/08, 63/23, 9/24 i 50/24), a u vezi sa članom 61. i 62. Poslovnika Visokog sudskog i tužilačkog vijeća Bosne i Hercegovine („Službeni glasnik Bosne i Hercegovine“, br. 55/13, 96/13, 46/14, 61/14, 78/14, 27/15, 46/15, 93/16, 48/17, 88/17, 41/18, 64/18, 12/21, 26/21, 35/21, 68/21, 1/22, 26/23, 83/23, 9/24 i 27/24), Visoko sudsko i tužilačko vijeće Bosne i Hercegovine (u daljem tekstu: Vijeće), u sastavu tužilac Sanin Bogunić, predsjednik Vijeća, sudija Velimir Ninković, potpredsjednik Vijeća, sudija Obren Bužanin sutkinja Aleksandra Obradović, tužiteljica Snježana Petković, tužiteljica Željka Fabić, tužiteljica Bojana Jolović, tužitelj Saša Sarajlić, prof. dr. Džamna Vranić, dr. sc. Davor Martinović, advokatica Elma Veleđar Arifagić i advokatica mr. Duška Bogojević, na sjednici održanoj 24. i 25.9.2025. godine, donijelo je

R J E Š E N J E

o imenovanju sudije u Općinski sud u Sarajevu

- I. Za sudiju Općinskog suda u Sarajevu imenuje se **Čengić Edin**.
- II. Datum stupanja na dužnost imenovanog Vijeće će odrediti posebnom odlukom.

O b r a z l o ž e n j e

Na osnovu člana 36. Zakona o Visokom sudskom i tužilačkom vijeću Bosne i Hercegovine (u daljem tekstu: Zakon o VSTV-u BiH) i člana 33. i 34. Poslovnika Visokog sudskog i tužilačkog vijeća Bosne i Hercegovine (u daljem tekstu: Poslovnik VSTV-a BiH), Vijeće je na internet stranici dana 07.11.2024. godine objavilo javni konkurs pod brojem: 04-07-3-4035-1/2024, kojim je oglašeno 7 (sedam) pozicija sudije Općinskog suda u Sarajevu.

Nakon provedene konkursne procedure, nadležno podvijeće je u skladu s članom 59b. st. (1), (3) i (4), a u vezi sa članom 60. Poslovnika VSTV-a BiH izvršilo finalno rangiranje kandidata, te je Vijeću dostavilo rang listu kandidata sa obrazloženim prijedlogom za postupanje.

Razmatrajući zaključenu rang listu kandidata i utvrđeni broj bodova, kao rezultat ocjenjivanja svih kriterija propisanih Zakonom o VSTV-u BiH i Poslovnikom VSTV-a BiH, Vijeće je odlučilo da na 6 (šest) oglašених pozicija sudije Općinskog suda u Sarajevu imenuje kandidate na rang listi pod rednim br. 1, 2, 3, 5, 6 i 7 Beširević - Nurković Selmu, Čaušević Eminu, Nanić Anesa, Bandić Atu, Čengić Edina i Granić Čizmo Enu.

Dakle, Vijeće je odlučilo da za petu od sedam oglašених pozicija sudije Općinskog suda u Sarajevu imenuje kandidata na rang listi pod rednim brojem 6 Čengić Edina, iz reda bošnjačkog naroda, koji trenutno, počev od 03.05.2017. godine, obavlja poslove sudskog stručnog savjetnika u Vrhovnom sudu Federacije BiH.

Što se ostalog radnog iskustva tiče, imenovani kandidat je u periodu od 03.07.2017. godine do 16.10.2017. godine obavljao je poslove v.d. sekretara Vrhovnog suda Federacije BiH, od 2015. do 2017. godine obavljao je poslove stručnog savjetnika u Federalnoj upravi za inspekcijske poslove. Od 2013. godine do 2015. godine bio je advokatski pripravnik u Advokatskoj kancelariji Gušo Nihad. Od 20.02.2012. do 06.7.2012. godine bio je Young professional u ICTY. Od 2011. godine do 2012. godine radio je kao pripravnik u Sudu BiH, te je od 2010. godine do 2011. godine bio pripravnik u Uredu registara Bosne i Hercegovine.

Vijeće je ocijenilo da imenovani kandidat u potpunosti ispunjava uslove za imenovanje propisane u članu 43. Zakona o VSTV-u BiH.

Kriteriji stručnosti i sposobnosti pravne analize imenovanog kandidata utvrđeni su na osnovu rezultata kvalifikacionog i pismenog testiranja, dok su ostali kriteriji, koji se odnose na sposobnost kandidata da odgovorno, neovisno i nepristrano obavlja funkciju za koju se prijavio, profesionalne nepristranosti i ugleda, te ponašanja van posla, dosadašnjeg radnog iskustva kandidata, edukacije i usavršavanja, objavljivanja stručnih i naučnih radova, te drugih aktivnosti u struci i komunikativnosti, utvrđeni na razgovoru pred nadležnom komisijom Vijeća, kojom prilikom je svaki član komisije neovisno bodovao kriterije, kako je to propisano u čl. 54., 54a., 54d., 54e. i 54f. Poslovnika VSTV-a BiH.

Kada je u pitanju broj ostvarenih bodova, Vijeće je imalo u vidu da je imenovani kandidat u toku konkursne procedure, za kriterij stručnosti i sposobnosti pravne analize ostvario ukupno 92,75 od mogućih 100 bodova, dok je na razgovoru pred nadležnom komisijom Vijeća u pogledu ostalih kriterija ostvario ukupno 13 od mogućih 20 bodova, što ga je u konačnici rangiralo na peto mjesto rang liste kandidata sa ukupno ostvarenih 105,75 od mogućih 120 bodova.

Pored ukupnog broja ostvarenih bodova, na osnovu kojih je kandidat shodno čl. 59a. stav (1) tačka a) i 59b. st. (3) i (4) Poslovnika VSTV-a BiH stekao uslove za predlaganje i imenovanje na poziciju sudije općinskog suda, Vijeće je vodilo računa o okolnostima koje su relevantne za procjenu podobnosti kandidata iz člana 48a. ovog poslovnika, kao i o potrebi osiguranja adekvatne nacionalne i spolne zastupljenosti u navedenom sudu, u smislu člana 43. stav (2) Zakona o VSTV-u BiH.

Vijeće je prilikom imenovanja navedenog kandidata ocijenilo da ne postoje okolnosti koje izazivaju sumnju u pogledu podobnosti kandidata za poziciju za koju se prijavio.

Adekvatna nacionalna zastupljenost u konkretnom sudu utvrđena je na osnovu popisa stanovništva iz 1991. godine.

Nacionalna struktura 137 sudija, prema popisu stanovništva iz 1991. godine, bi trebala biti: Bošnjaci (69,7), Hrvati (9,6), Srbi (37,1) i Ostali (20,6). Trenutna nacionalna struktura 102 sudija: Bošnjaci (51), Hrvati (9), Srbi (26) i Ostali (16).

Prema prethodno navedenoj nacionalnoj strukturi u Općinskom sudu u Sarajevu nedostaje kandidata bošnjačke nacionalnosti (-18,7), srpske nacionalnosti (-11,1), ostalih (-4,6), te kandidata hrvatske nacionalnosti (-0,6).

Dakle, imajući u vidu trenutnu nacionalnu strukturu u Općinskom sudu u Sarajevu, Vijeće je u konkretnom slučaju na petu od sedam oglašanih pozicija sudija navedenog suda imenovalo šestorangiranog kandidata, koji dolazi iz reda bošnjačkog naroda.

Vijeće smatra da imenovani kandidat posjeduje potrebno stručno znanje, kao i potrebno radno iskustvo, te da ispunjava sve uslove da obavlja poziciju sudije Općinskog suda u Sarajevu, a to posebno cijeneći njegovo radno iskustvo koje je sticao na poziciji sudskog stručnog savjetnika u Vrhovnom sudu FBiH. Navedene činjenice su u okviru postupka ocjenjivanja za pojedine kriterije jasno izražene kroz ocjene pred nadležnim organima Vijeća za provođenje konkursnih procedura.

Imajući u vidu sve navedeno, Vijeće je primjenom kriterija iz člana 43. st. (1) i (2) Zakona o VSTV-u BiH, a u vezi sa okolnostima iz člana 59b. stav (5) i člana 61. Poslovnika VSTV-a BiH ocijenilo da je imenovani kandidat u potpunosti ispunio zakonom propisane uslove, kao i druge kriterije koji se cijene prilikom izbora kandidata, kako bi bio imenovan na poziciju sudije Općinskog suda u Sarajevu.

Shodno članu 86. stav (8) Zakona o VSTV-u BiH sudija ili tužilac koji je prvi put imenovan na funkciju u pravosuđu, početni izvještaj dostavlja u roku od 30 dana od dana imenovanja na funkciju.

U pogledu stava II. dispozitiva ovog rješenja, stupanje na dužnost imenovanog se odgađa do okončanja dodatne provjere iz člana 86d. stav 6) Zakona o VSTV-u BiH, odnosno do okončanja upravnog spora, ukoliko je pokrenut protiv rješenja o imenovanju.

Ovo rješenje će biti objavljeno na internet stranici Vijeća, shodno članu 44. stav (1) Zakona i članu 62. stav (4) Poslovnika VSTV-a BiH, uz naznaku datuma objave od kojeg počinje teći rok za podnošenje tužbe.

Imajući u vidu sve iznesene razloge, Vijeće je odlučilo kao u izreci ovog rješenja.

Uputa o pravnom lijeku: Protiv ovog rješenja može se pokrenuti upravni spor pred Sudom Bosne i Hercegovine u roku od osam dana od dana objavljivanja rješenja o imenovanju na internet stranici Vijeća.

Broj: 04-07-3-3300-1/2025

Datum: 25.9.2025. godine

Predsjednik VSTV-a BiH

MP

Sanin Bogunić



